

NELSON ODUBER TA PIDI INVESTIGACION CONTRA TUR HENDE MENOS SU PERSONA CU A COMETE CRIMEN CONTRA PUEBLO

ORANJESTAD (AAN): Segun AVP, lider di oposicion pa di tantisimo bes ta trata di mancha integridad di hende y di gobierno, garrando un buki di Zaandam, cu ta

basa riba insinuacionnan sin base.

Esaki ta tipico di Nelson Oduber, un politico negativo, esun mas grandi cu Aruba a

yega di conoce den su historia politico.

Nunca antes Aruba a yega di conoce un politico cu no kier discuti riba capacidad of filosofia, pero a base di insulto, menosprecio y acusacionnan sin base.

Ki speranza un pais por tin den un lider politico cu despues di cinco aña cu e ta den oposicion, no a compronde e esencia cu e mester a manda su gobierno cas.

Un lider cu ta biba cu maldad politico, cu falta di respet pa otro rivalnan y simplemente no ta compronde cu gobernacion di un pais, ta algo serio y respetuoso.

Corrupcion, maldad, malgastamento di placa, mal maneho, y otro palabranan negativo ta loke e vocabulario di Nelson Oduber y awor e ta garra un biki di Zaandam, den cual e ta falta respet pa cantidad di hende, sin cu e lider di oposicion ta para pa nan interes.

Nelson Oduber ta un politico asina "sensitivo" cu ainda

e ta sufrir di heridanan politico di añanan bieuw pero e ta promer den liña pa aplica herida riba contrincante of otro hendenan den sociedad. Den pasado partido AVP a yega di muestra c'un politico di MEP ta dispuesto pa braza diabel mes pa asina hunga su weganan politico, y Nelson Oduber ta confirma esaki tambe.

Nelson Oduber den su frustracion grandi, cu e ta bibando cune casi seis aña caba manera un desilusion grandi, ta algo cu e mes tin cu biba cune ya cu ta NELSON Oduber a baha su gobierno na 1994.

Ora cu el a baha su gobierno ningun hende a bise cu el a comete corrupcion, ningun hende a tilde di ta meti den droga of cualkier otro irregularidad.

Al contrario Nelson Oduber mes a huzga y sentencia su mes aceptando na Hulanda cu su Gobierno ta MALO, cu su gobierno a hiba mal gobernacion y ningun hende a force di

baha su gobierno.

No tabatin manifestacion, no tabatin sindicatonan cu a force di baha y ningun hende a obligue di baha su gobierno na 1994, pero ta Nelson Oduber mes a ADMITI cu su gobierno ta malo y el a informa esaki durante di e cumbre na luna di Oktober na 1993 na Promer Minister Ruud Lubbers.

Lider di oposicion mester ta mas sincero y muestra bon cla cu e ta trata di kita atencion di loke Gobierno ta haciendo y ta tuma e buki di Zaandam, pa negligencia e protocol cu gobierno a firma cu sindicatonan, caminda gobierno ta duna trahadornan mas cu 10 milyon Florin bek, na placa cu den pasado gobierno di MEP a kita for di nan.

Nelson Oduber tambe ta forma parti di e arreglo aki, e tambe ta haya su parti cu e tin derecho ariba y no ta nechi cu awor e ta braza un buki, mescos cu el a haci den pasado, pa difama e pueblo arubano.

Comerciante a core den caya grandi tras di shoplifternan

ORANJESTAD (AAN): Un comerciante Indio cu tin su establecimiento den Caya Betico Croes a gara un muher cu a horta den su negoshi.

Tabata den oranan di atardi, cu a drenta dos muher di habla hispano den establecimiento y nan a cuminsa pas paña. Un di muher a pidi e gerente si e por tin otro size. E comerciante a bay busca e size pa e cliente. Ora cu e

homer a regresa el a nota cu e dos muhernan a bandona e establecimiento.

No a keda comerciante nada otro pa sali enbusca di e muhernan aki. El a haye ta core tras di e muhernan y altura di BBC, lenga afo tog el a logra su meta y a dal man riba un di e muhernan.

E comerciante a kita short y blusa for di dje y alaves un tas di e shoplifternan.

E tas a worde entrega na Recherche y den esaki a worde haya un pasaporte di un homer Peruano di inicialnan D.E.M.R.

E caso tin pleno atencion di autoridad.

Sociedad Dominicana ta celebra fecha di Independencia di Pais cu charlanan interesante

ORANJESTAD(AAN): -- SDA (Sociedad Dominicana en Aruba) ta invita comunidad di Aruba en general y colonia Dominicana en particular pa un serie di charla na ocasion di celebracion di e di 156 aniversario di Independencia Nacional di Republica Dominicana.

E charlanan lo tuma lugar Diahuebs y Diabierna venidero na Biblioteca Nacional na Playa y lo ta gratis.

Esun di Diahuebs 24 di Februari ta titula "El significado historico de nuestra independencia", lo dura di 8'or pa 10'or di anochi y lo ta den man di Enrique Kelkboom Peguero.

Riba Diabierna 25 di Februari lo tin dos charla, esun titula "Infecciones vaginales" y e otro "Deficiencia de la via respiratoria en niños".

E charlanan di Diabierna lo dura di 8:15'or pa 10'or di anochi y lo ta den man di ginecologo y obstetra dr. Magaly Deyanira Santoni (Infecciones vaginales) y pediatra dr. Maria Josefina Perez (Deficiencia de la via respiratoria de niños).

Tur dos especialista ta practica na Republica Dominicana.

DI HART PA SPEED!!

